

IN MEMORIAM

Prof. dr. Lutvija Karić

Profesorica Lutvija Karić rođena je 14. marta 1970. godine u Tuzli. Svoje djetinjstvo i mladost provela je u Živinicama, gdje je završila osnovnu i srednju školu sa odličnim uspjehom. Nakon toga svoj obrazovni put nastavila je na Poljoprivrednom fakultetu Univerziteta u Sarajevu, gdje je 1988. godine kao redovan student upisala studij na Odsjeku za ratarstvo, a diplomirala 1995. godine.

Njen naučni i stručni put bio je obilježen stalnim usavršavanjem, predanim radom i težnjom ka novim saznanjima. Postdiplomski studij upisala je 2001. godine. Magistarski rad pod naslovom „Uticaj sistema uzgoja i doze azota na dinamiku rasta i prinos praziluka i celera“ odbranila je 2004. godine i stekla zvanje magistra poljoprivrednih nauka.

Svoj naučni razvoj krunisala je odbranom doktorske disertacije pod naslovom „Kvantitativne i kvalitativne osobine praziluka u zavisnosti od sorte i gnojidbe azotom“, koju je odbranila 20. novembra 2009. godine na Poljoprivredno-prehrambenom fakultetu Univerziteta u Sarajevu, čime je stekla zvanje doktora poljoprivrednih nauka. U februaru 2015. godine izabrana je u zvanje vanrednog profesora, a u septembru 2020. godine u zvanje redovnog profesora za oblast Povrtlarstvo.

Profesionalni put profesorice Karić bio je ispunjen odgovornošću, stručnim radom i velikim doprinosom razvoju poljoprivredne nauke i obrazovanja. Tokom agresije na Bosnu i Hercegovinu, u periodu 1992 - 1993. godine, bila je angažovana kao nastavnik hemije i biologije, pokazujući posvećenost obrazovanju i u najtežim okolnostima.

Od marta 2000. do septembra 2002. godine radila je kao stručni saradnik na Poljoprivrednom institutu Butmir, u laboratoriji za ispitivanje kvaliteta i zdravstvene ispravnosti namirnica i predmeta opšte upotrebe. U tom periodu bavila se analizama teških metala, kontrolom kvaliteta u hemijskoj laboratoriji, kao i mikrobiološkom kontrolom ispravnosti namirnica. Učestvovala je u edukativnim programima i u radu komisija za ocjenu kvaliteta biljnih proizvoda na međunarodnim sajmovima u Gradačcu i Sarajevu.

Od septembra 2002. godine započinje svoj akademski rad na Poljoprivrednom fakultetu Univerziteta u Sarajevu kao asistent na predmetima Povrtlarstvo i Tehnologija čuvanja proizvoda. Godine 2005. izabrana je u zvanje višeg asistenta na predmetu Povrtlarstvo, a 21. maja 2010. godine u zvanje docenta za oblast Povrtlarstva.

Tokom svoje akademske karijere bila je nosilac i realizator nastave na brojnim predmetima iz oblasti povrtlarstva, biljne proizvodnje i čuvanja poljoprivrednih proizvoda, među kojima su: Povrtlarstvo I, Povrtlarstvo II, Specijalno povrtlarstvo, Proizvodnja povrća u zaštićenom prostoru, Proizvodnja gljiva, Proizvodnja rasada, Biološki i ekološki činioci uzgoja povrća, Agrobiotopi zaštićenog prostora, Uskladištenje i čuvanje ratarsko-povrtnarskih proizvoda, Poznavanje i kontrola sirovina, Opšte ratarstvo i povrtlarstvo i Čuvanje povrća.

U nastavnom radu profesorica Karić nije samo prenosila znanje, nego je svojim pristupom oblikovala generacije studenata i budućih stručnjaka. Kontinuirano je unapređivala kvalitet nastave, povezivala teoriju i praksu i podsticala studente na istraživački rad. Njena posvećenost, dostupnost i stručnost ostavili su dubok trag kod svih koji su imali priliku učiti od nje.

Kao profesorica ostvarila je značajan doprinos razvoju povrtlarke nauke i prakse. Objavila je 68 naučno-stručnih radova i sedam knjiga, te učestvovala u realizaciji više od 34 projekata, od kojih je u šest domaćih i devet međunarodnih bila rukovodilac.

Poseban doprinos dala je razvoju povrtlarstva i hortikulture proizvodnje u Bosni i Hercegovini, kroz naučni i stručni rad, ali i kroz primjenu savremenih pristupa u proizvodnji i unapređenju ruralnog razvoja. U okviru ovog djelovanja bila je i voditeljica projekata Turske agencije za međunarodnu saradnju i koordinaciju (TIKA), koji su bili usmjereni na ekonomsko osnaživanje žena i domaćinstava u ruralnim područjima kroz dodjelu plastenika, sistema za navodnjavanje, sadnog materijala i edukacije iz plasteničke proizvodnje. Ovi projekti su imali i širi društveni značaj, jer su doprinosili razvoju povrtlarstva i unapređenju dostupnosti hrane, posebno za socijalno osjetljive kategorije stanovništva.

Profesorica Karić značajno je doprinijela i razvoju visokog obrazovanja na Poljoprivredno-prehrambenom fakultetu Univerziteta u Sarajevu. Aktivno je učestvovala u procesu transformacije studija prema principima Bolonjskog procesa i bila koordinator aktivnosti na izradi dodiplomskih i master studijskih programa Fakulteta ispred Instituta za ratarstvo. Bila je član Odbora za II ciklus studija i Vijeća doktorskog studija Fakulteta.

Poseban doprinos njenom stručnom razvoju dale su brojne međunarodne posjete i programi usavršavanja. Među njima se izdvaja jednomjesečni boravak u Izraelu 2008. godine, gdje je učestvovala na kursu „Internacionalni standardi povrća i voća“, čime je dodatno unaprijedila svoje znanje iz oblasti standardizacije i kvaliteta poljoprivredne proizvodnje.

Kroz brojna stručna usavršavanja, međunarodne konferencije i saradnju sa naučnim i obrazovnim institucijama u zemlji i inostranstvu, profesorica Karić kontinuirano je pratila savremena dostignuća u oblasti povrtlarstva. Učestvovala je na brojnim stručnim skupovima, često kao član naučnih i organizacionih odbora, te prenosila stečena znanja u nastavni i kroz praktični rad.

Svoje znanje i iskustvo nesebično je dijelila i izvan matične institucije. Tokom dvije akademske godine bila je angažovana kao nastavnik na Biotehničkom fakultetu Univerziteta u Bihaću, gdje je izvodila nastavu iz predmeta Povrtlarstvo.

Kao stručni ekspert održavala je edukacije i predavanja iz oblasti povrtlarstva u različitim gradovima Bosne i Hercegovine, a njena stručnost bila je prepoznata i kroz učešće u komisijama za ocjenu kvaliteta i izbor nastavnika u akademska zvanja na više visokoškolskih ustanova.

Poseban dio njenog akademskog rada predstavljao je rad sa studentima i mladim istraživačima. Bila je mentor na 10 master radova i dvije doktorske disertacije. Pored toga, učestvovala je u izradi i odbrani brojnih završnih, magistarskih i doktorskih

radova, te bila mentor na više desetina završnih radova prvog ciklusa studija. Kao članica ili predsjednica komisija učestvovala je u ocjeni i odbrani više od 40 završnih radova drugog ciklusa studija na Poljoprivredno-prehrambenom fakultetu Univerziteta u Sarajevu.

Od 2018. do 2021. godine obavljala je funkciju prodekana za nastavu Poljoprivredno-prehrambenog fakulteta, gdje je svojim znanjem, iskustvom i odgovornošću doprinijela unapređenju kvaliteta nastavnog procesa.

Iza profesorice Lutvije Karić ostaje izuzetno bogato akademsko i stručno naslijeđe - naučni radovi, knjige, projekti, unaprijeđena nastava i generacije studenata koje je oblikovala. Njeno ime ostat će trajno povezano sa razvojem povrtlarske nauke u Bosni i Hercegovini, ali i sa predanošću, znanjem i ljudskošću koje je unosila u svoj rad.

Pored vrlo značajnog naučnog doprinosa, profesorica Karić je ostavila neizbrisiv trag u srcima svojih kolegica, kolega, prijatelja, poznanika, i ono najvažnije, svoje porodice, koja joj je uvijek bila na prvom mjestu. Profesorica Karić je vjerovala da je važnije biti dobar čovjek nego imati sve ovozemaljske titule. Kako se riječi nižu, uviđam koliko je teško pretočiti sve emocije u riječi dostojne da opišu profesoricu Karić kao moju mentoricu i profesoricu. Kada bih mogla izabrati jednu sliku koja će mi zauvijek ostati u sjećanju i podsjećati me na nju, to bi bila slika: savršena frizura, blistave plave oči, okružena najljepšim cvijećem i svojom porodicom.

Doc. dr. Čerima Zahirović Sinanović